

35-A. YESU o LBARNOTI KARSIS
Matayo 19:16-26, Luka 18:18-30, Marko 10:17-27)

Ore nabo onlong' eewuo olbarnoti karsis enetii Yesu nejoki, "Olaiteng'enani supat, kaa bae naikishiaan aas pee atum enkishui nemeish?"

Nejoki Yesu, "Ainyoo pee kinkilikuan nanu inenkishiaa? Obo ake eetai aa supat; kake te naa iyieu nijing' atua enkishui, imbung'a inkitanapat."

Nejoki, "Akua?" Nejoki Yesu, "Kajo iyilou. Miar metua, miloloito, mipurrisho, minchakenoki elejare. Iyanyita minyi o ng'utunyi, tonyorra ole latia ino anaa kewan."

Nejoki ilo barnoti ninye, "Aidipa aibung'a nena pooki ebaiki apa ara enkerai: amaa, ainyoo ae naatong'orikia?"

Neing'or Yesu olbarnoti akurraki inkonyek nenyorru nejoki, "Te naa iyieu niaku bayaroti, shomo timira masaa pooki niaata, inchoo ilaisinak, neaku iata olchumati te shumata, nikilotu asuj."

Ore pee ening' ilo barnoti ilo rorei, nelo eisininuo amu eata masaa kumok.

Nejoki Yesu ilooiteng'eni lenyena, "Esipa ajoki intae nchere egol pee ejing' olkarsis enkitoria e keper. Naitoki ajoki intae, kelelek te ntames eim enaudoto o ltidu alang' olkarsis ejing' enkitoria e keper."

Ore pee ening' ilooiteng'eni lenyena neing'asia oleng' nejo, "Aing'ae naa oidim atajeu?"

Nekurraki Yesu nkonyek nejoki ninche "Meidimayu ina too ltung'ana, kake eidimayu pooki te Nkai."

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Ira iyie karsis? Tia oitoi? Ore te kulikae rorei, kakua mayianat arashu kidimata iata, arashu inkishoorot iata tiatua enkishui ino?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keyiolo Enkai (Yesu) pooki toki?**
 - Neyiolou Yesu enaikununo empukunoto o lbarnoti karsis. Neyiolou sii ajo metaaniki oltau lenye enjeunoto anaa enadamu ninye. Neikilikuan ninye INKIKILIKUANAT pee eret ninye atayiolo enaikununo oltau lenye.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Teniyieu nintiship Enkai eimu enkibung'ata oo nkitanapat lasima nias nimbung' pooki inkatitin pooki nemipang'ori ai kata! Ore amu etanya eing'ueki ina karsisho enye neitodolu ina ajo etabatate eitu eanyit inkitanapat enyorrata o lkulikae. Kepiak ninye to ltau lenye.
 - Meidimayu pii pee eibung' iltung'anak inkitanapat e Nkai pooki kata. Ore ilo barnoti karsis nedamu ajo eibung'a neanyit inkitanapat anaa enaishiakino pee eitajeu. Kake eitu edol ajo lasima pee eibung' inkitanapat tiatua oltau lenye kake me tioriong' ake. Ore oltau

lenye neton etii ing'ok. Ore tenkitanyaanyukoto, isoma Matayo 5:21, 22, 27,28, 31, 32, 43, 44.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ketem oltung'ani ajo aitiship Enkai tenkarsisisho aashu too inkiasin sidain. Nedamu olbarnoti ajo ore enkarsisisho enye naa olmonokie oitiship Enkai. Kake meidimayu.
- Kelej oltung'ani kewan eiruk ajo etabaikia iyieunot e Nkai neishiakino nejeu.
- Kake meidim oltung'ani atajeu kewan. "Ore te tung'ani nemeidimayu." Lasima pee eishoru Enkai enkoitoi.
- Eketem oltung'ani ajo alotu enetii Enkai too nkoitoi enyena. Nejo ilo barnoti, "Kaa toki aidim ataasa pee atum enkishui nemeish?" Keyieu apa neing'uraa tenaa keatae ai kiti toki neidim atoponye nena siaitin enyena sidain pee eitiship Enkai.
- Kake meng'amu Enkai nena kiasin ang' sidian eji pee kitumie enjeunoto. Eitu eng'amu Yesu nena kiasin enyena sidain. Kake enyaaka aliki kulie kumok!
- Amaa, idamu iyie ajo keyieu Yesu nemir pooki tung'ani nena masaa enyena pee ejeunye? (a-a) Ainyoo?
- Ore pee ejoki Yesu ninye, "Timira masaa inono pooki," keyieu Yesu neitodol ninye ajo keisilig nena masaa enyena alang' enaisilig Enkai. Keata apa olbarnoti masaa kumok enkarsisisho neiwuasayu. Orrindik apa ninye too nena Masaa enyena.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kakua mayianat iata iyie tiatua enkishui ino? Masaa? Enkidimata? Enkisuma? Enkisisa? Amaa inchoo iyie kuna tokitin metaa mindim aing'ura Yesu niomon empalikinoto o eretoto.
- Nejo Yesu te pooki tung'ani, "Timira pooki." Kainyoo idamu ajo keipirta tenejo "Timira pooki"? Ainyoo igira aenikino? Ainyoo igira amitiki Enkai? Ainyoo igira agolie pee miminie?
- Kaji kitelejie ing'ok inono tenkaraki enkewan ino? Kakua kiasin sidain iyieu nirridu tenkaraki neishoo ninche oltau lino metawuasayu?